



ATASSUT INATSISARTUNI

ATASSUT

UKA 2013/59-1

Gerhardt Petersen

15.10.13

Meerartaarnermut atatillugu Nunatsinni tulluarsakkamik aningaasaateqarfiliornissamut periarfissanik misissuinissaq siunertaralugu Naalakkersuisut suliffeqarnermik suliaqartunut isumaqatigiinniarnissamik aallarnisaanissaannut peqquneqarnissaannik Inatsisartuni aalajangiiffigisassatut siunnersuut. Meerartaarnermut atatillugu aningaasaateqarfieu akissarsiallit tamakkerlutik maanna ullormusiaqartitsinermiit pitsaanerusumik atugaqalernissaat qulakkiissavaa.

(Inatsisartunut ilaasortaq Naaja Nathanielsen, Inuit Ataqatigiit)

Inuit Ataqatigiit sinnerlugit Inatsisartuni ilaasortaq Naaja Nathanielsen matumani siunnersuuteqarpoq suliffeqarnermik suliaqartut isumaqatigiinniarfigineqassasut meerartaarnermut atatillugu aningaasaateqarfiliornissaq siunertaralugu misissuisoqarnissaanut.

ATASSUT-mit erseqqissaatigissavarput ilaqtariit meerartallit toqqisisimallutik inuuneqarnissaat sutigut tamatigut qulakteerniarlugu naalakkersuinikkut sulisoqarnissaa uagutsinnut pingaaruteqarluinnarmat.

Taamatulli oqareerluta ATASSUT-mit paasiuminaatsipparput siunnersuuteqartup soq misissuinissaq siunertaralugu isumaqatigiinniartoqartariaqarnersoq sunalu isumaqatigiinniutigineqassanersoq?

ATASSUT-mit ataqqilluinnarparput sulisitsisut sulisullu akunnerminni kiffaanngissusertik atorlugu sulinermi atugassarititaasut pillugit naminneq isumaqatigiinniarsinnaatitaanerat, taamaammatt pissusissamisoorsorinngilarput Inatsisartut qulaaniit aalajangersaaniarnissaat.



ATASSUT INATSISARTUNI

Allatigut ilaqtariinnut meerartalinnut iluaqtissiiniarnissamik saqqummiisoqarpat ATASSUT-mit oqaloqataakutsussaagut, matumanili siunnersuutigineqartoq peqataaffigisinnaanngilarput oqareernitsitut sulinermi aammalu meerartaarnermut atatillugu sulinngiffeqarnermi atugassarititaasut pillugit isumaqatigiinniarnerit maani aalajangersagassaanngimmata.

Taamatut naatsumik oqaaseqarluta aammalu Naalakkersuisut akissuteqaataat isumaqatigisarput innersuussutigalugu ATASSUT-mit inassutigissavarput siunnersuut ilalerneqassanngitsoq taamatullu isikkoqarluni aappassaaneerneqassasoq.